

## Edizioni

- letto 281 volte

### Shepard-Chambers

I.

Li fol e·il put e·il filol  
creison trop e no m?es bel;  
e·il croi joglaret novel,  
enojos e mal parlan,  
corron un pauc trop enan;  
e son ja li mordedor,  
per un de nos dui de lor,  
e non es qui los n?esqerna.

II.

Greu m?es car hom lor o col  
e non lor en fai revel.  
Non o dic contra·N Sordel,  
q?el non es d?aital semblan  
ni no·is vai ges percassan,  
si co·il cavallier doctor;  
mas qan faillon prestador,  
non pot far cinc ni sieis terna.

III.

Lo marques part Pinarol,  
que ten Salus e Revel,  
non vuoil ges que desclavel  
de sa cort ni an loignan  
Persaval, que sap d?enfan  
esser maestre e tutor,  
ni un autre tirador,  
qu?eu no vuoil dir, de Luserna.

IV.

Aitals los a cum los vol,  
lo marques, Ençantarel,  
Nicholet e Trufarel,  
que venon ab lui e van,  
e non del tot pel lor dan.

Be-is son trobat d'un color:  
aitals vassals tal seignor!  
Dieus lor done vita eterna.

V.

Ar veiretz venir l'estol  
vas Malespina e'l tropel,  
don an la carn e la pel;  
et ades on pieitz lor fan,  
e meins de merce lor an.  
Trop son lo combatedor  
e pauc li defendedor:  
mort son si Dieus no·ls governa.

VI.

Estampidas e romor  
sai que faran entre lor,  
menassan en la taverna.

- letto 260 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911  
CF 80209930587 PI 02133771002

---

**Source URL:** <https://letteraturaeuropaea.let.uniroma1.it/?q=laboratorio/edizioni-465>